

# Fähnli im Wind



**Texscht : Mike Sutter**  
**Musig : Mike Sutter**

**Du bisch äs Fähnli wo sech munter dräit  
je nachdäm wohär dr Wind grad wäiht  
d'Richtig isch nid wichtig  
s'isch jedi Richtig richtig  
Hauptsach s'lüftlet miud u dezänt  
Ir warme Luft bisch Du im Elemänt**

**gar nid gärn hesch de ruuche Wind im Gsicht  
bisch sowieso uf aus was ruuch isch nid eso epicht  
vermiidisch jede Fäuhpass  
machschr nume das wo'd weisch dass  
dr weder s'Mu no d'Finger dran verbrönnsch  
bisch jo so ne hochsensible Mönsch**

**u wenn dr de doch emou ä Fähler passiert  
wird dä Bock bizyte, bisite delegiert  
u wird är de entdeckt  
bi däm wo ne hesch gschteckt  
bisch gärn dä wo dr erscht Chempe schieusst  
und us sicherer Dischtanz s'Massaker gniesst**

**Drfür - und für das hesch Du äs bsungers guets Oug  
sunnisch Du Di gnüsslech i frömdem Erfoug  
doch mach drbi Dis s'Mu zue  
Di Zunge isch scho bruun gnue  
u das wo uselosch das tönt drno  
u schmöcke tuet es o no grad e so**

**Prinziplosigkeit isch Dis einzige Prinzip  
wüu säuber nie ä Meinig hesch bisch froh um jede Tip  
was guet tönt wird kopiert  
u blitzschnäu adaptiert  
wächslisch loufend s'Gsicht u dr Ton  
glichsch Di a wie nes Chamäleon**

**aus absolute Assimilierigs-Akrobat  
beherrschisch Du dr Salto und vor auem dr Schpagat  
bisch unerhört flexibu  
und dadurch kompatibu  
für aues und für jede we's rantiert  
aus angere wird schamlos denunziert**

**Du wäusch gäng dr Wäg vom gringschte Widerschtang  
u d'Leitplanke schtecksch drbi extrem wi usenang  
Du schlänglich Di so düre  
lieber hingerzi aus füre  
lieber näbedüre aus drdür  
wuecherisch di ine wie nes Gschwür**

**Di Lieblingslösigsasatz isch dr Kompromiss  
bisch jederzyt bereit für nes chliises Zuegschtändniss  
s'muess go wie düre Anke  
ohni Züün u Schranke  
befriedigsch Di Profilierigs-Gluscht  
ohni jedi Rücksicht uf Verluscht**

**I schänk dr äs paar Schueh vo mir, bloos dri so viü de wotsch  
u füre Trip mi Buggu ab wünsch i Dir guete Rutsch  
hey, hett das guet to  
und mer chli mi Wuet gno  
Merci für die Zyt mit Dir - und Tschou  
blib wie de bisch - und läb wouh**